

EKALESIA FAAPOTOPOTOGA KERISIANO I AMERIKA SAMOA

**“Taga’i Malamalama i le Soifuaga Atoa:  
Tuana’i, Nei ma le Lumana’i”**



**“E Olioli ma Fiafia i le Alii i Mea Lelei ua  
Saunia mo lana Fanau”**

**Sauniga Fuifui Lotu o le  
Tausaga Fou 2015**

Ianuari 1 – Ianuari 4, 2015

## **Faatomuaga**

Ua filifilia le mataupu autu o le Sauniga Talosaga amata o lenei tausaga fou, mai le faasologa o le Kalena Kerisiano o le 2015: Aso Tofi, o le ulua'i aso o le tausaga, ma le Aso Sa, o le ulua'i Aso Sa o le tausaga fou 2015.

O le ulua'i aso o le tausaga o le Aso Tofi lea, ua aofia ai tusi faitau nei: Failauga 3:1-13, Salamo 8, Faaaliga 21:1-6a, ma le Mataio 25:31-46. Ua fausia mai i nei tusi faitau se autu e faapea: *“Taga’i Malamalama i le Soifuuga Atoa: Tuana’i. Nei, ma le Lumana’i.”*

O le ulua'i Aso Sa o le tausaga ua aofia ai tusi faitau nei: Ieremia 31:7-14, Salamo 147:12-20, Efeso 1:3-14, ma le Ioane 1:1-9, 10-18. Ua fausia mai i nei tusi faitau se autu, e faapea: *“E Olioli ma Fiafia i l Alii i Mea Lelei ua Saunia mo lana Fanau.”*

### **Fautuaga ma Tapenapenaga Faale-Agaga:**

1. O le autu e mafaufau ma manatunatu i ai Ta'ita'i o le Sauniga, a e maise le 'au fai tatalo: Faafetai, Faatoesega, ma Mana'oga.
2. Ua filifilia se fuaiupu, po'o ni fuaiupu mai Tusi Faitau, o tusi mai le Feagaiga Tuai ma le Feagaiga Fou, e taula'i i ai ni lagona ma ni manatu e apoapoa'iina ai le faapotopotoga ua aofia i Sauniga Tatalo.
3. Mafaufauga & Manatunatuga: O ni lu'itau faale-mafaufau ina ia faaosofia ai se lagona ma ni manatu, e tusa ma Afioga filifilia faapitoa mai le Tusi Paia, e apoapoa'iina ai le faapotopotoga.
4. Ua saunia ni faamatalaga 'oto'oto e faatatau i Tusi Faitau mai le Tusi Paia, e fesoasoani lea i le silafia ma le iloa o se uiga loloto o Afioga a le Atua, e pei ona faitauina. Ua na o se fesoasoani puupuu, a e tatala pea le avanoa e sailiili ai i le loloto ma le taua o Afioga folafola a le Alii le Atua.

## **Saunia o Talosaga:**

O le faamoemoe ma le autu taua o le Fuifui Lotu i le amataga o le tausaga fou, ia saunia ai le Ekalesia ma e ua talitonu ma faatuatua i le alofa ma le agalelei o le Atua, e le gata i aso ua tuana'i, a e faapea foi i nei ona aso ma le faasologa o aso e tele o lumana'i ai i lenei foi tausaga 2015

Ua tusia i la tatou faasologa, o le tatalo o le Faafetai, le Faatoesega, faapea foi i Mana'oga. Ua na o se ta'iala itiiti ma vaapiapi mo le 'au tofia ma sauniuni e fai ma sui e faaleoina a tatou talosaga amata i lenei tausaga fou. O le tele ma le anoanoa'i o a tatou Faafetai, Faatoesega, ma Mana'oga, o le a faafeagai pea lea ma le Ekalesia i nuu ma afioaga.

Ia manuia, ma ia fesoasoani mai pea le Agaga Paia, e faaloto teteleina i tatou e faia ai lana galuega folafola ma tala'i atu le Tala Lelei ia Iesu Keriso i lenei foi tausaga fou.

Ia manuia le Tausaga Fou 2015!

-Faatonu o le "LAMEPA" EFKAS

**Aso Tofi Ianuari 1, 2015**

**“Taga’i Malamalama i le Soifuaga Atoa:  
Tuana’i, Nei ma le Lumana’i”**

**Tusi Faitau:** Failauga 3:1-3, Faaaliga 21:1-6a

**Upu Faamamafa: Failauga 3:13b** - “...ia taitasi le tagata ma ‘ai, ma inu, ma fiafia i mea lelei i ana galuega uma; o le mea foaiina mai lea e le Atua.” **Faaaliga 21:6a** - “Ua fetalai mai foi o ia ia te a’u, ‘Ua uma ona fai. O a’u le Alefa ma le Omeka, o le amataga ma le gataaga.’...”

**Mafaufauga & Manatunatuga:**

1. Na faia e le Atua le lagi ma le lalolagi i le amataga, sa lelei ma matagofie mea uma lava. O a ni foliga faale-Atua e mafai ona e mafaufau i ai, ma manatunatu foi i ai e tusa ma le autu ua tusia i luga? E pei ona tusia i le tusi faitau? (Failauga 3).
2. Ua faafouina mea tuai sa i ai, a ua vaايا ma faalogoina uiga fou ma le leo fou – e maua ai le leo fiafia ma le olioli. O le a se vaaiga e pito sili ona ofoofogia i lau vaai ma lau faalogo? Faamata e i ai se aoga mo lau faiga malaga i lenei tausaga fou? (Faaaliga 21).
3. O le a se talitonuga o le Failauga e faatatau i le taimi tuanai, le taimi nei, ma le taimi lumanai? A o le a foi le talitonuga e mafai ona e maua mai le tusi o Faaaliga i lea lava mataupu – Tuana’i, Nei ma le Lumana’i?

**Faamatalaga o Tusi Faitau:**

Failauga 3:1-13: Ua le o se olaga faigofie o loo soifua ai nei le tagata i le lalolagi. E pei e tele ina faapito tasi le vaai ma manatunatuga o le tagata pe a fetaia’i ma mea faigata ma puapuaga o le olaga. Peitai, o le Atua ma lona finagalo, e tutusa mea uma – e suesueina e le Atua mea tutupu i le taimi tuanai, le taimi nei, ma le taimi lumanai. E ao ina fiafia ma olioli le tagata i mea ua na maua i lona olaga.

Faaaliga 21:1-6a: O e ua talitonu ma faatuatua ia Iesu Keriso, latou te vaavaai atu i lo latou lumana’i – ua faafouina mea uma. O le lalolagi tuai, e fausia i mea tuai; a o le lalolagi fou, e faaa’upegaina i mea fou – e i ai le olioli ma le fiafia.

O fea o tu ai le aai e pito sili ona manaia i lau vaai? O le a se mea na e vaai i ai i lena aai ua ofo ai lou loto? Afai o le tausaga ua te’a na e vaavaai ai i lea aai, po’o se isi lava taimi, faamata o le a se mea e ao ona e faia e manatua ai pea lena vaaiga matagofie i lenei tausaga fou? Mafaufau i se uiga loloto o upu faamamafa o lenei Aso Talosaga, “...*Ua uma ona fai. O a’u le Alefa ma le Omeka, o le amataga ma le gata’aga...*”

### **Talosaga:**

**Faafetai** – Faafetai i le Atua ona o lona alofa ma lona agalelei i le tausaga ua tuana’i, faapea i le tele o aso ua mavae. Faafetai ona o lenei aso, a e maise le faamoemoe mo le lumana’i manuia e pei ona naunau i ai le tagata Kerisiano.

**Faatoesega** – E tele lava mea sese ma le lē tonu sa fetaia’i ai i aso ua mavae, a e tatalo ma le loto maulalo ina ia faamagalo mai i mea ua matou sese ai. Ia saunia se loto fou mo la matou faiga malaga i lenei tausaga fou ma le lumanai.

**Manaoga** – Ia faamanuia mai Oe le Atua e, i la matou malaga faale-tausaga ua amataina nei. Le Keriso e, ia fesoasoani mai lou Agaga e tonu ma manuia a matou taumafaiga uma. O lou Suafa Iesu, lo matou Alii, e ala atu ai a matou talosaga, Amene.

**Aso Faraile Ianuari 2, 2015**

**“Taga’i Malamalama i le Soifuaga Atoa:  
Tuana’i, Nei ma le Lumana’i”**

**Tusi Faitau:** Salamo 8, Mataio 25:31-46

**Upu Faamamafa: Salamo 8:6, 9** – *“Ua e foaiina ia te ia le pule i galuega a ou aao; ua e tuuina mea uma i lalo o ona vae... (9) Le Alii e, lo matou Alii, e silisili lava lou Suafa i le lalolagi uma lava.” Mataio 25:34* – *“...O mai ia, o outou ua faamanuaina e lo’u Tamā, ia fai mo outou tofi le malo ua saunia mo outou talu ona faavaeina le lalolagi...”*

**Mafaufauga & Manatunatuga:**

1. Ua molimau le tusi o Kenese (2:27ff – *“Ona faia lea e le Atua o le tagata i lona faatusa,... na faia e ia o i laua o le tane ma le fafine. Ua faamanuia foi e le Atua ia te i laua...”* Pe i ai se faamoemoe i le lumanai e autu i ai lenei molimau? (Salamo 8).
2. O le filifiliga a le tagata e iloa ai le tonu ma le faamaoni, e faalagolago i mea sa tutupu, se ia o’o mai i le taimi nei. O loo taatia ai i ina se lumana’i o lē na tuuina i ai tiute ma matafaioi e tatau ona faatinoina. O le a sou lagona i lea faasologa e tau atu i le sala faavavau ma le ola faavavau? (Mataio 25)
3. O le a se talitonuga o le fai Salamo e faatatau i le taimi tuanai, le taimi nei, ma le taimi lumanai? A o le a foi le talitonuga e mafai ona e maua mai le Evagelia a Mataio i lea lava mataupu – Tuanai, Nei ma le Lumanai?

**Faamatalaga o Tusi Faitau:**

Salamo 8: E lautele ma tumu le lalolagi i mea ofoofogia e le ma faitauina ua saunia e le Atua. O le mea lea, e viia ai ma faaneeneina e le tagata le paia ma le mamalu o le Alii le Atua. O le tagata na fausia i le faatusa paia o le Atua, o le mea lea, e ao ina taua ma aloa’iaina le tagata. Na auina mai e le Atua le Tamā lona Alo pele e toatasi, o le faatusa pito maualuga ma mamalu o le Atua Silisili ese.

Mataio 25:31-46: Ua mae'a ona saunia e le Alii o Iesu le togiola mo a tatou agasala. O i latou uma o e talitonu ma faatuatua i lea faatinoga, latou te maua le manuia e faavavau. O i latou foi ua lē talitonu i lea faatinoga, latou te maua le tau i le faasalaina e faavavau. E sili ona faamanuiaina le talitonu ma faatuatua na i lo le lē talitonu ma lē faatuatua. E faamaonia lea filifiliga i le ola faavavau i le malo ua uma ona saunia.

### **Talosaga:**

**Faafetai** – Faafetai i le Atua, ona o lona alofa ma lona agalelei i le tausaga ua tuana'i, faapea i le tele o aso ua mavae. Faafetai i le faasinoga a le Agaga Paia ua tatou iloa ai le ala e ao ina tatou ui atu ai i le manuia ma le ola faavavau.

**Faatoesega** – E tele lava mea sese ma le lē tonu ma le lē faamaoni. A e ui lava i lea, ia tatou tatalo ma le loto maulalo ina ia faamagalō mai. Ia saunia se loto fou mo le manuia o le lumanai.

**Manaoga** - Le Atua e, ia e fesoasoani mai i le saunia ma le faatinoina o a matou filifiliga e fai i lenei tausaga fou ua matou savalia. Ia matou iloa ona filifili i mea lelei, a e le o mea e leaga ai. Le Alii e, lo matou Atua, ia e faamanuia mai i a matou taumafaiga uma taitoatasi, aua so matou manuia i le lumanai. Ia tatou faatasi pea ma lau Afio e lelei ai, Amene.

**Aso Toonai Ianuari 3, 2015**

**“E Olioli ma Fiafia i le Alii i Mea Lelei  
ua Saunia mo lana Fanau”**

**Tusi Faitau:** Ieremia 31:7-14, Efeso 1:3-14

**Upu Faamamafa: Ieremia 31:13** – *“Ona olioli ai lea o le taupou i le siva, o taulelea foi faatasi ma toeaina; ou te liua foi lo latou faanoanoa i le fiafia, ma ou faamatalaloto ia te i latou, ou te faafiafia ia te i latou sa tiga i latou.”* **Efeso 1:3** – *“Ia faafetaia le Atua, o le Tamā o lo tatou Alii o Iesu Keriso, o lē ua faamanuia mai ia te i tatou i mea uma lava e manuia ai i la le Agaga, i mea o i le lagi, ona o Keriso...”*

**Mafaufauga & Manatunatuga:**

1. O le Atua le Tamā, o lo tatou faasinoga sili lea; o Iesu Keriso o lo tatou faatonu ala sili lea; ma le Agaga Paia o lo tatou faamoemoe lea i taimi uma. Pe ai se a lava ua tatou lē mafaia ai ona mulimuli i lenei taitaiga lelei i aso uma? (Ieremia 31)
2. O lo tatou faaolaina e mai le Atua lea, e ala ia Iesu Keriso lo tatou Alii. O le faaolaina ua ta’ua i le Efeso, e aofia le taimi tuanai, taimi nei ma le taimi lumanai. O le fesili: Pe faapefea ona tatou faatusatusaina le molimau a Paulo ma lo tatou ola ai i le lalolagi i lenei foi tausaga? (Efeso 1)
3. E olioli ma fiafia i le Alii le fanau ola talitonu ma faatuatua i le Atua, e ala ia Iesu Keriso ma le togiola ua mae’a ona saunia. Se’i taga’i ma silasila po’o le a se faatinoga e ao ina tatou fuafua ma galuea’iina, e ala i tusi faitau o lenei aso tatalo?

**Faamatalaga o Tusi Faitau:**

Ieremia 31:7-14 Ua folafolaina le toe fuata’iina o le lumanai manuia mo le nuu o le Atua. E faafouina le feagaiga tuai sa i ai, a e sili le taua o le feagaiga mo le taimi nei ma le lumana’i. O faigata ma puapuaga sa i ai, e ao ina taga’i malamalama i le manuia o le a o’o mai. O le faamoemoe taua lava lea e tasi ai le



tagata talitonu ma faatuatua moni i le Alii le Atua e ona malosi uma lava.

Efeso 1:3-14 Ua tulaga ese le tusi lenei a Paulo na i lo isi ana tusi, e faatatau i le ‘au faatuatua ma talitonu i le faaolataga na saunia e Iesu Keriso. O le mataupu iloga o lo’o faasino i ai le tusi lenei o Efeso, o le viiga lea ma le faafetai i le alofa silisili ese o le Atua le Tamā, e ala ia Iesu Keriso ma le togiola ua uma ona saunia. O faamanuiaga ia mo le ‘au faatuatua ma talitonu ia Iesu Keriso.

### **Talosaga:**

**Faafetai** – Ia tatou faafetai i le Atua le Tamā, Iesu Keriso le Faaola, ma le Agaga Paia o lo tatou fesoasoani sili lea i taimi uma o lo tatou ola talitonu ma faatuatua i le manuia e faavavau. Faafetai ona o lenei faasinoga ua tatou iloa ai sa lē tuulafoaiina i tatou i tausaga ua mavae, se ia o’o mai lava i le amataga o lenei foi tausaga. O le mea lea, tatou te le faanoanoa ai, aua e mafuta mai pea le Atua i lo tatou lumanai manuia.

**Faatoesega** – Ia tatou faatoesa ona ua tatou lē faalagolago ma faamoemoe i le taitaiga lilo a le Agaga o le Atua, e mafai ai ona tatou mulimuli tonu i ala e manuia ai. Ua tosina pea o tatou tagata i le musumusuga a Satani, e ala i le loto tuinanau ma le manatu faapito. Le Atua e, ia avea le togiola na saunia e Keriso Iesu e fai ma faavae o lo matou toefuataina i lenei tausaga, aua so matou lelei ma le manuia e faavavau.

**Manaoga** – Ua matou tatalo ia foai mai le fiafia ma le olioli i le Alii i o matou loto, ma ia tumau ai e fai ma fu’a taualuga i aso uma o lo matou ola. Ia avea lo matou fiafia ma olioli o se a’upega tutotonu ia i matou e tetee atu i soo se faaosoosoga ma tofotofoga i aso uma, ma taimi uma se ia o’o i le faavavau, Amene.

**Aso Sa Ianuari 4, 2015**

**“E Olioli ma Fiafia i le Alii i Mea Lelei  
ua Saunia mo lana Fanau”**

**Tusi Faitau:** Salamo 147:12-20, Ioane 1:(1-9), 10-18

**Upu Faamamafa: Salamo 147:12, 13** – *“Ierusalemā e, ia e vivii atu i le Alii; Siona e, ia e vivii atu i lou Atua; aua o loo faamalosiā e ia o faamau faalava o ou puipui; o loo faamanuia e ia lau fanau i totonu ia te oe.”* **Ioane 1:14** – *“Ua liu tino tagata le Upu, sa mau foi o ia ma i tatou, na matou matamata i lona mamalu; o le mamalu lava lea o le Alo e toatasi o le Tamā, ua tumu o ia i le alofa tunoa ma le faamaoni.”*

**Mafaufauga & Manatunatuga:**

1. Ua faailoa mai e le fai Salamo le taua o le soifua vivii ma le ola tapuai i le Atua Silisili ese. Pe faapefea ona tatou faatinoia lea lava tiute i lenei foi tausaga fou 2015? (Salamo 147)
2. Ua faaaogaina e le tusitala o Ioane, le Alii le Atua i se vaaiga e ese mai i isi tusi a le ‘au faievagelia – *“o le Upu sa i le amataga.”* E faapefea ona tatou faaaogaina lea vaaiga e tusa ma le taimi tuanai, taimi nei, ma le taimi lumanai? (Ioane 1)
3. O le autu o lenei aso tatalo ua faataua ai le *“olioli ma le fiafia i le Alii”*. Afai o loo atagia i tusi faitau e pei ona ta’ua (Salamo & Ioane), o le fesili: O ai le *“fanau”* lea ua faataua i ai le autu o le *“olioli ma fiafia i le Alii”*?

**Faamatalaga o Tusi Faitau:**

Salamo 147: 12-20 Ua faailoa mai e le fai Salamo le silisili ese ma le maua luga o le lagi ma le lalolagi, o fuafuaga mamana ia a le Atua soifua: o fetu (f.4), o le faitauina o le tau (f.8), o atunuu ma malo (f.14), o mea uiga eseese (ff. 16-18), o le faapogai lea o le silisili ese o le mana malosī na faia ai mea uma i le amataga. E alofa mutimutivale le Atua i ana mea na fai. O le mea lea, ua tatau ai le viiga ma le faamanu i lana Afio.

Ioane 1: (1-9), 10-18 Ua faaupuina e Ioane se tasi o uiga loloto o le Atua Tolu-Tasi: E mai le amataga o mea uma i le lagi ma le lalolagi, e o’o lava i le faavavau e leai sona i’uga. O le Alii le Atua, e ala i le afio mai o le Alo pele e toatasi i le lalolagi, o le faatinoga lava lea o le mafutaga faatasi o le Atua ma le tagata e silisili ona maualuga. Ma, ua sili atu le evagelia a Ioane i lea tulaga nai so’o se isi lava vaega o le Feagaiga Fou ma le Feagaiga Tuai – *“Ua liu tino tagata le Upu.”*

### **Talosaga:**

**Faafetai** – Ia tatou faafetai i le Atua, ona o le afio mai o lona Alo pele e toatasi, ua fai ma o tatou faatuatua i le manuia ma le ola e faavavau. O le taitaiga sili lena ua fai ma pogai o le ola tautua ma auauna i le tele o tausaga ua tuana’i, le taimi nei, a e maise le faamoemoe lumanai i le ola faavavau.

**Faatoesega** – Ia tatou faatoesa ona ua lē tutusa le tele o a tatou folafolaga ma ta’utinoga faale-faatuatua ma amioga faaalua i aso taitasi. Ia faamagalō mai le Atua i lona Ekalesia Kerisiano, e ala i le faataunuuna o tiute ma matafaioi tau’ave faale-talalelei. E ui lava ina tatou agasala pea, ua tatou talitōnu i le togiola na saunia e Iesu Keriso e magalo ai a tatou agasala uma lava.

**Manaoga** – Ia tatou tatalo mo le lelei ma le manuia o a tatou galuega faatino i lena tausaga fou. Ia atagia le moni o le ola *“fiafia ma olioli i le Alii”* i a tatou faatinoga uma, e ala i le tala lelei ia Iesu Keriso. Ia tatou maua atili le loto fiafia e vivii ma faamanūina le Suafa o Keriso Iesu, o le Ao o le Ekalesia Kerisiano i le lalolagi. O lo tatou faatuatua ma le talitōnu faamaoni, e auala mai ai le lumanai manuia ma le ola faavavau, Amene.



TAUTUA PRINTING Press  
PO BOX 1537 | Tel: 699-9810 | Fax: 699-1898  
Kanana Fou, Pago Pago, AS 96799  
[http:// www.efkas.org](http://www.efkas.org)